

# Pengajaran dari peristiwa ini menurut Mahathir<sup>(P)</sup>

UM 23 MAY 1991

KUCHING 22 Mei — Perdana Menteri, Dato' Sri Dr. Mahathir Mohamad hari ini merakamkan rasa terharu dan sedih atas kematian bekas rakan sejawatannya dari India, Rajiv Gandhi yang terbunuh dalam satu letupan bom di Tamil Nadu semalam.

Beliau menyifatkan kematian Rajiv sebagai satu kehilangan besar kepada India dan rakyat yang cintakan keamanan.

"Rajiv adalah seorang yang saya kenali... dan saya berasa amat sedih dengan cara kematiannya dan keadaan yang berlaku di India sekarang," ujarnya.

Mengulas mengenai tragedi yang menimpa negara yang sedang bersiap sedia untuk menjalankan pilihanraya di mana Rajiv adalah salah seorang calon utama untuk kembali menerajui India, Dato' Sri Dr. Mahathir berkata, sistem demokrasi tetap tidak akan memberi makna jika ia berakhir dengan pertumpahan darah.

"Kita boleh katakan betapa baiknya sistem demokrasi itu tetapi ia tetap tidak bermakna jika sistem itu tidak difahami dan kotak undi tidak dihormati," ujarnya.

Menurut Perdana Menteri, mengambil tindakan bunuh bukanlah sebahagian daripada proses demokrasi.

"Pengajaran yang boleh kita ambil dari peristiwa yang berlaku di India ialah betapa pentingnya kita menyelesaikan masalah secara aman tanpa melibatkan emosi

yang keterlaluan dan sebab itulah kita di sini menekankan kepentingan keamanan dan kestabilan... bila tidak ada kestabilan orang akan menjual keamanan dan demokrasi," tegas beliau.

Sementara itu Presiden MIC, Dato' Sri S. Samy Vellu turut merasa terharu dengan kematian Rajiv Gandhi.